



# ILIDŽA



INFORMATIVNI BILTEN  
OPĆINE ILIDŽA

Decembar 2018 • Broj 177





REDOVNA SJEDNICA OPĆINSKOG VIJEĆA

## Budžet Općine Ilidža 28.500.000 KM

Općinsko vijeće Ilidža sa 20 glasova za i sedam protiv donijelo je Budžet Općine Ilidža za 2019. godinu u iznosu od 28.500.000 KM. Efikasan i uspješan proces srednjoročnog planiranja budžeta zahtijeva posvećenost i racionalnost svih relevantnih učesnika u budžetskom procesu (uključujući Vladu KS, Skupštinu KS, Ministarstvo finansija, (informacije koje se dobivaju iz FMF-a i korisnike budžeta Vlade KS). Prema ovom Budžetu najveća sredstva planirana su za tekuće kapitalne projekte po MZ i to 10.193.000 KM. Za izgradnju saobraćajnice Ilidža-Hrasnica sa tramvaj prugom million, izgradnju osnovne škole na Stupu milion, za izgradnju vodovodne mreže 550.000 KM, kanalizacije 600.000KM, 450.000 KM za regulaciju vodotoka i 400.000 KM za izgradnju pješačkog mosta kod OBI-ja. Za obrazovanje planirano je 470.000 KM, zdravstvo 100.000 KM, vjerske objekte 200.000 KM, kulturu 450.000 KM, socijalne pomoći 400.000 KM, sport 390.000 KM te za finansiranje udruženja 600.000 KM. Na sjednici održanoj 27.decembra 2018. godine u Multifunkcionalnoj sali Općinsko vijeće donijelo je Odluku o izvršavanju Budžeta Općine Ilidža za 2019. godinu. Tom Odlukom uređuje se struktura prihoda i primitaka, rashoda i izdataka Budžeta Općine Ilidža za 2019. godine, njegovo izvršavanje, prioriteti plaćanja, zaduživanje, izdavanje garancija, upravljanje dugom i finansijsko izvještavanje.

### Usvojen Akcioni plan za realizaciju Strategije razvoja Općine Ilidža za 2019. godinu

Vijećnici Općinskog vijeća Ilidža usvojili su Akcioni plan za realizaciju Strategije razvoja Općine Ilidža za 2019. godinu. Akcioni Plan sadrži listu prioriternih projekata, čija realizacija otpočinje u prvoj godini provedbe strategije, a sažeto navodi elemente važne za planiranje i praćenje njihove implementacije, uz orijentacione izdatke i očekivane izvore finansiranja kao i status pripremljenosti projekata. Akcioni plan omogućava pravilno planiranje troškova i izvora finansiranja predviđenih projekata i njihovo pravodobno uključivanje u općinski budžet, ali i druge budžete (entiteta, kantona, donatora, EU, itd.) na čiju se finansijsku podršku računa tokom provedbe. Bez odgovarajuće posvećenosti i odluka općinskog rukovodstva, prvenstveno načelnika općine, nema djelotvornih strategija i planova lokalnog razvoja, navedeno je u Akcionom planu. Od krucijalne važnosti je i kontinuirana uključenost i podrška Općinskog vijeća kroz redovno razmatranje izvještaja o napretku u implementaciji strategije, te usklađivanja općinskih politika sa prioritetima strategije razvoja. Vizija Ilidže u 2020. godini je razvijena, sigurna i otvorena zajednica, unaprijeđenog poslovnog okruženja i kvaliteta života građana, očuvanog okoliša i prepoznatljivog identiteta.

#### VIJEĆE

### Prijedlozi akata o regulisanju imovinsko-pravnih odnosa

Vijeće je usvojilo prijedlog akata o regulisanju imovinsko-pravnih odnosa i to prijedloge rješenja o rješavanju imovinsko-pravnih odnosa u svrhu legalizacije stambenih objekata po zahtjevima Džemala Šabotića i Alije Kolašince, te prijedloge rješenja o rješavanju imovinsko-pravnih odnosa u svrhu legalizacije stambeno-poslovnog objekta po zahtjevu Emina Gačevića. Vijeće je donijelo odluku o utvrđivanju javnog interesa za rekonstrukciju i dogradnju pješačke staze na dijelu magistralne ceste Gromiljak-Blažuj po zahtjevu JP Autoceste Federacije BiH.



## Odluka o raspisivanju javnog poziva za predlaganje kandidata za dodjelu priznanja

Odluka o raspisivanju javnog poziva za predlaganje kandidata za dodjelu priznanja, također bila je jedna od tačaka dnevnog reda. Tom odlukom Općinsko vijeće Ilidža raspisat će Javni poziv za predlaganje kandidata za dodjelu priznanja Općine Ilidža i to: Povelja počasni građanin/građanka općine Ilidža, Povelja za životno djelo, Zlatna plaketa, Srebrna plaketa, Zahvalnica i Plaketa odbrane.

Priznanja Općine Ilidža dodjeljuju se pojedincima i kolektivima sa područja općine Ilidža za izuzetne uspjehe u razvoju privrednih i društvenih djelatnosti, kao i značajan doprinos u odbrani općine. Izuzetno, priznanja se mogu dodijeliti pojedincima i kolektivima koji nisu sa područja općine Ilidža, ako su njihovi rezultati primjereni ugledu općine. Priznanja se ne mogu dodijeliti kolektivima ili pojedincima kojim su priznanja dodijeljena u posljednjih pet godina. Priznanja se ne mogu dodijeliti uposlenicima Općine Ilidža za rezultate ostvarene u obavljanju poslova predviđenih opisom radnog mjesta, izabranim zvaničnicima svih nivoa vlasti u Bosni i Hercegovini za vrijeme trajanja mandata, licima koji su pravosnažnom presudom domaćeg ili stranog suda osuđena na zatvorsku kaznu za krivična djela, kao i licima koji svojim djelovanjem narušavaju ugled općine.



## Dino Jajagić (SBB), Ammar Uzunović (SDP) i Izet Krupalija (SDA) položili zakletvu

Na lokalnim izborima 2016. godine mandate su dobili vijećnici Dževad Poturak (SBB), Nermin Muzur (SDA) i Smiljana Viteškić (SDP). Nakon što su ovi vijećnici dobili mandate na drugim nivoima vlasti, ubuduće vijećnici Općinskog vijeća Ilidža bit će Dino Jajagić (SBB), Ammar Uzunović (SDP) i Izet Krupalija (SDA) koji su položili zakletvu na 21. redovnoj sjednici vijeća.

## Stipendije za 172 učenika i 56 studenata slabijeg imovnog stanja

Općina Ilidža i ove godine stipendirat će djecu bez oba roditelja i roditeljskog staranja i to 22 učenika iz osnovne, srednje 10, te osam studenata. Također, stipendije će dobiti i učenici slabijeg imovinskog stanja i to 172 učenika srednjih škola i 56 studenata. To je odlučilo Općinsko vijeće Ilidža na 21. redovnoj sjednici. Za stipendiranje djece za školsku 2018/2019. godinu odobravaju se sredstva iz Budžeta Općine Ilidža u mjesečnim iznosima i to učenicima osnovnih i srednjih škola po 75,00 KM, te redovnim studentima po 100,00 KM. Isplate će se vršiti počev od 01. oktobra 2018. godine završno sa 30. septembra 2019. godine.



## Program rada Općinskog vijeća za 2019. godinu

Vijeće je na sjednici usvojilo Program rada Općinskog vijeća Ilidža za 2019. godinu, kojim su utvrđeni zadaci i prijedlozi akata koje će Vijeće razmatrati u toku naredne godine, a koji proizilaze iz zakona, utvrđene politike i ekonomskog razvoja općine, kao i druga pitanja iz njenog samoupravnog djelokruga. Na dnevnom redu Općinskog vijeća na redovnim sjednicama tokom 2019. godine, pored budžeta naći će se i nacrti, prijedlozi odluka, informacije, izvještaji i drugi akti iz njegove nadležnosti.

Općinsko vijeće je u 2019. godini planiralo i održavanje jedne temarske sjednice na kojoj će se razmatrati rješavanje pitanja pružanja komunalnih usluga na području općine Ilidža u oblasti vodovoda, kanalizacije, gradskog prijevoza, komunalnog otpada, čistoće javnih površina sa osvrtom na kapitalne investicije. Planirano je održavanje svečanih sjednica u povodu obilježavanja 1. marta - Dana nezavisnosti Bosne i Hercegovine, 12. marta - Dana Općine Ilidža, 28. juli - Godišnjice Četvrte viteške motorizovane brigade i 25. novembra – Dana državnosti Bosne i Hercegovine.

Pored utvrđenih tačaka u Programu rada Općinskog vijeća za 2019. godinu, Vijeće će donositi odluke i druge akte iz svoje nadležnosti na prijedlog Općinskog načelnika prema programu rada službi za upravu izvršne vlasti u njihovoj tekućoj djelatnosti, kao i na osnovu akata koje budu donosili naležni organi Federacije BiH i Kantona Sarajevo.

## Ilidža prva općina u BiH očišćena od mina

Vijeće je u skladu sa programom rada za 2018. godinu primilo k znanju Informaciju o ugroženosti teritorije općine Ilidža od neeksplozivnih ubojnih sredstava i minsko-eksplozivnih sredstava za period januar 2018.-novembar 2018. godine. U informaciji je istaknuto da su u ovom periodu započeti i završeni radovi na projektu deminiranja područja „Zoranovići“ površine 3.045.000 kvadratnih metara za čiju realizaciju je izdvojeno 300.000 KM iz budžeta Općine Ilidža i projekat deminiranja „Vela“ površine 800.000 metara kvadratnih. U ovom periodu je pronađeno i uklonjeno 21 ručna bomba, pet tromblona, pet granata, jedna protivtenkovska mina, 482 komada municije, 200 grama plastičnog eksploziva i jedan ručni bacač granata. Kad je u pitanju deminiranje u predhodnom ciklusu, Ilidža je po elaboratu koji je izdao BH MAC imala 17.416.100 metara kvadratnih rizične površine koja je deminirana, proglašena očišćenom od mina.

## Informacija o uspjehu u učenju i vladanju

Na sjednici jedna od tačaka bila je i Informacija o uspjehu u učenju i vladanju učenika osnovnih i srednjih škola na području općine Ilidža u školskoj 2017/2018. godini koju je vijeće primilo k znanju. Nastavni program se odvijao u skladu sa zakonom, koji je u cijelosti realizovan. Informacija je rađena na osnovu izvještaja o realizaciji godišnjih programa rada škola za školsku 2017/2018. godinu, a na osnovu novog Zakona o osnovnom odgoju i obrazovanju Kantona Sarajevo i Zakona o srednjem obrazovanju Kantona Sarajevo.

Općina Ilidža je Osnovnoj muzičkoj školi Ilidža donirala koncertni klavir u iznosu od 52.650 KM, a potpisan je i sporazum za zamjenu prozorskih portala u vrijednosti 33.000 KM. Općina je izdvojila i 40.000 KM za dažke učine za socijalno ugrožene učenike osnovnih škola sa područja općine Ilidža, te 8.000 KM javnim ustanovama predškolskog, osnovnog i srednjeg obrazovanja za nabavku higijenskih sredstava.



## Budžet po mjeri građana

Općinsko vijeće Ilidža na 20. redovnoj sjednici održanoj 29. novembra 2018. godine u Multifunkcionalnoj sali utvrdilo je Nacrt Budžeta u iznosu 28.500.000 KM i uputilo ga na javnu raspravu po MZ. U svih 16 MZ održane su javne rasprave na kojima su predstavnici Općine Ilidža pojašnjavali građanima strukturu budžeta kao najvažnijeg finansijskog dokumenta, a poslušali su i prijedloge i sugestije građana za 2019. godinu.

Stanovnici MZ Bumir kao prvi prioritet koji su iznijeli na javnoj raspravi je izrada projekta separativne kanalizacione mreže koja prolazi kroz Butmirsku cestu od početka do kraja, te asfaltiranje ulica Orlovačke, krakova Butmirske ceste, Hipodrom, nastavak regulacije male Tilave i Željeznice, kao i dogradnja javne rasvjete u Butmirskoj cesti, Butmirski vrtovi i Hipodrom. Jedan od prioriteta je i rekonstrukcija Doma kulture u Butmiru.

Stanovnici MZ Donji Kotorac traže da se u 2019. godini nastavi asfaltiranje saobraćajnice i pješačke staze 13. juni, regulacija vodotoka male Tilave, te postavljanje dvije nadzorne kamere u dva ulaza, u naselje na raskršću ulica Aerodromska i 13. juni, te Aerodromska i Tuneli.

U MZ Sokolović-Kolonija na javnoj raspravi traženo je da se nastave aktivnosti na izgradnji tramvajske pruge Ilidža-Hrasnica, nastavak radova na saobraćajnici uz Željeznicu iznad Ratnog mosta, nastavak Inicijative Općinskog vijeća Ilidža prema Zavodu za planiranje KS za izradu Regulacionog plana Sokolović- Kolonija II dio /ul. Zeleni put, Hrasnička cesta, Podigmanska, Seada Bublina i Igmanska cesta, postavljanje ležećih policajaca ili vibro traka u ulicama Igmanska cesta, Ibrahim hafiza Ridanovića, Ferhat paše Sokolovića, Huseina Đoze, Most spasa, Sejfulaha Prohe, Francuske revolucije i Prve bošnjačke brigade, izrada projektno-tehničke dokumentacije te izgradnja brane od šljunka kojom bi se podigao nivo Željeznice, nastavak uređenja korita Željeznice i iznad Ratnog mosta, a između ostalog, pristupiti izradi projektno-tehničke dokumentacije za lokalitet na kojem se gradi sportska dvorana.

Građani Hrasnice I, između ostalog tražili su da u 2019. godini asfaltira se dio ulica Put spasa, rekonstrukciju dijela glavne vodovodne mreže od rezervoara na Igmanu do kuća u ulici Bunica, rekonstruisati i sanirati postojaća dječija igrališta i sportske plohe, izgradnju niskonaponske elektro mreže za naselje Zoranovići, čišćenje korita Bunice.

Nastaviti aktivnosti na izgradnji tramvajske pruge Ilidža-Hrasnica kao glavni prioritet iznijeli su građani MZ Hrasnice II. Nastavak aktivnosti na legalizaciji bespravno izgrađenih objekata, aktivnosti na izradi RP Kovači, asfaltiranje ulica Lemekanija, Himze Mekića, Stari drum, projektovanje, izgradnja i dogradnja distributivne gasne mreže u ulicama kojima nije urađena, izgradnja dječijeg igrališta na području Kovača, samo su neki od prioriteta koji su iznijeli građani ove MZ na javnoj raspravi.

Izvršiti rekonstrukciju ulica Gornja mahala, Kakrinjski put, Buhotina, Stanjevac, Šamin gaj, krpaza udarnih rupa u ulicama Kakrinjski put, Gornja mahala, Zenik, Buhotina i Česma, nastavak izgradnje II faze vodovodne mreže u MZ Rakovica, nastavak radova na izgradnji kanalizacione mreže, rješavanje odvodnje oborinskih voda u ulici Bistrički put, čišćenje svih potoka, neki su od prioriteta građana MZ Rakovica.

Na javnoj raspravi o Nacrtu budžeta za 2019. godinu građani MZ Ilidža-Centar, istakli su ove prioritete: izgradnja saobraćajnice iz ulice Bosanskih gazija na magistralni put M-17, izgradnja niske rasvjete na pješačkoj stazi u ulici Emira Bogunića Čarlija od apoteke do stare Željezničke stanice, sanacija ulične rasvjete u ulici Josipa Slavenskog od broja 26 i 28, izgradnja kanalizacione mreže u ulici Zaima Topčića, čišćenje korita Željeznice, sadnja drveća uz pješačku stazu u ulici Emira Bonuća Čarlija.

Izvršiti postavljanje sigurnosnih kamera-video nadzora u ulicama Samira Čatovića Kobre-parking, Jahiela Fincija – tri kamere, Ramiza Jašara-parking, Josipa Pančića – dvije kamere, Vinka Samarlića, Krste Hegedušića i IV Viteške Brigade-tri kamere, Hamze Čelenke – kod objekta "G" – IV Viteške brigade raskršće-dvije kamere, rekonstrukcija ulice Ramiza Jašara, rekonstrukcija trotoara u ulici Josipa Pančića i Hamze Čelenke, izgradnja nedostajće kanalizacione



mreže u naselju Vrutci, snimanje postojeće kanalizacione mreže i izvršiti rekonstrukciju gdje je to potrebnom samo su neki od prioriteta koji su iznijeli građani MZ Lužani.

Na javnoj raspravi u MZ Vreoca izneseni su ovi prioriteti: otvaranje kombi linije Vreoca-Lužansko polje, izgradnja pješačke staze, preuređenje i popunjavanje asfaltom postojeće u ulici Vreoca, postavljanje ležećih policajaca u ulici Vreoca i Blažujski drum, izgradnja javne rasvjete u ulici Lužansko polje kod OBI-ja.

Vrelo Bosne: izgradnja kružnog toka na raskršću Magistralnog puta M-17 – Plandište-Vrelo Bosne, asfaltiranje krakova ulice Mitrići, izgradnja biciklističke staze na relaciji Blažuj-Vrelo Bosne, izgradnja kanalizacione mreže u ulici Mitrići, izgradnja sportske plohe u ulici Bosanih ljljana, te izgradnja javne rasvjete u ulici Magistralni pout M-17.

MZ Blažuj: izrada RP naselja Vlakovo koje obuhvata ulice Vlakovo, Kovačevac i Rogaći, asfaltiranje ulice Vlakovo od broja 17, izgradnja pješačke staze u dijelu ulice Remze Ahmetovića, izgradnja kanalizacione mreže za ulicu Vlakovo, projektovanje i izgradnja vodovodne mreže u ulici Kamenolom, stambene zgrade u Blažuju spojiti na kolektor, izgradnja dječijih igrališta u ulicama Plantaža, Vlakovo i Stara pruga, rekonstrukcija mosta preko Zujevine, izgradnja nove trafostanice u ulici Kovačevac, samo su neki od zahtjeva građana.

MZ Osjek: pristupanje izradi izmjene i dopune Regulacionog plana obuhvatiti prostor gdje nije izgrađena prostorno-planska dokumentacija, nastavak izgradnje saobraćajnice od mosta prema ulazu u Osjek, postaviti odgovarajuću signalizaciju horizontalnu i vertikalnu po ukazanim potrebama i zahtjevima građana, planirati početak izgradnje kanalizacione mreže u ulicama Osječki put, Bratunačka cesta i Hendekuša.

MZ Otes: rješavanje imovinsko-pravnih odnosa i asfaltiranje ulice Sastavci, rekonstrukcija kanalizacione mreže u dijelu ulice Rahima Čatovića broj 2-40, dogradnja kanalizacione mreže u dijelu ulice Franje Vultetića, izgradnja dječijeg igrališta u ulici Terovića, izgradnja gasne mreže u ulici Šenada Fazlića.

MZ Stup: inicijativa za izradu Regulacionog plana Doglodi, dopuna RP Energoinvest, asfaltiranje ulica 14. septembar, ulice Bare, ulice 14. septembar, izgradnja kanalizacione mreže u ulici Zabosnice, Doglodske barice, regulisanje vodotoka Dobrinja, samo su neki prijedlozi građana koje treba riješiti u 2019. godini.

Izgradnja 11. osnovne škole, dogradnja objekta mjesne zajednice, asfaltiranje ulice Džemala Bijedića, proširenje Kasindolske ulice sa trotoarima, izgradnja mosta do ulice Dobrinjske, postavljanje metalnih stubova na betonskom koritu Dobrinje, prijedlozi su za uvrštavanje u Budžet za 2019 stanovnika Stup II.

Na javnoj raspravi u MZ Stupsko brdo potrebe su sljedeći: izgradnja parking prostora za stanovnike zgrade Tibra prema RP Stup Nukleus, asfaltiranje, rekonstrukcija i proširenje ulice dr. Silve Rizvanbegović, izgradnja uključno isključne trake u ulici Džemala Bijedića kod Rimokatoličkog groblja, dogradnja javne rasvjete u kraku ulice Džemala Bijedića između zgrada Avaza i Doma penzionera, izgradnja javne rasvjete oko sportske plohe u krugu kasarne, izgradnja ambulante porodične medicine i apoteke u Domu kulture.



## Domu zdravlja Ilidža dodijeljeno 96.612,88 KM

Općina Ilidža i ove godine nastavlja pomoć JU Dom zdravlja Kantona Sarajevo, odnosno Dom zdravlja Ilidža.

U Općini Ilidža 26. decembra 2018. godine načelnik Općine Ilidža prof.dr. Senaid Memić i direktorica Doma zdravlja Ilidža dr. Džana Šaćić potpisali su sporazum o dodjeli sredstava za realizaciju izvedbenog projekta za teretni lift u centralnom objektu Doma zdravlja Ilidža. Za ove namjene Općina Ilidža izdvojila je 96.612,88 KM.

“Sporazum je još jedna potvrda dobre saradnje Općine Ilidža i Doma zdravlja KS, jer Općina godinama prati naše potrebe. Ova sredstva našem Domu zdravlja će se koristiti za realizaciju izvedbenog projekta za veliki lift, jedan mali lift i lift za invalide, sanaciju i proširenje postojećeg okna za teretni veliki lift, njegovu ugradnju kao i za ugradnju malog lifta i lifta za invalide” rekla je dr.Šaćić.

Načelnik Općine Ildža prof.dr. Senaid Memić rekao je da Općina kontinuirano vodi računa o zdravlju na Ilidži i finansijski ga podržava, kako bi pružanje zdravstvenih usluga stanovnicima ovog dijela grada bilo što bolje.



## Stipendije za 394 talentovana učenika i studenta

Općina Ilidža i ove godine stipendirat će talentovane učenike i studente.

Općinsko vijeće Ilidža donijelo je Odluku o stipendiranju 394 talentovana učenika i studenta u školskoj/akademskoj 2018/2019. godini u ukupnom iznosu od 361.740 KM. Odlukom će se stipendirati 146 učenika srednjih škola i 248 studenta. Mjesečni iznos stipendije za učenike i studente prve godine je 78 KM, a za studente od druge do šeste godine kreće se u rasponu od 96 do 120 KM zavisno od postignutog rezultata u predhodnoj godini. Stipendije će se isplaćivati deset mjeseci. Sredstva dodijeljena stipendijom se ne vraćaju.

## Za zimsko održavanje cesta zadužene četiri firme

Za zimsko održavanje cesta na području općine Ilidža zadužene su četiri firme: MGBH d.o.o, Grakop, Nane Company i JP Ilidža. MGBH d.o.o čisti ulice u MZ Rakovica, Blažuj i Osjek. Grakop: Butmir, Donji Kotorac, Ilidža Centar, Otes, Stup I, Stup II i Stupsko brdo.

Nane Company čisti Sokolović-Koloniju, Hrasnicu I i II, Lužane, Vreoca i Vrelo Bosne. JP Ilidža zaduženo je za čišćenje pojedinih pješačkih staza u svim MZ.

Ekipe ove četiri firme su na terenu i čiste saobraćajnice u svih 16 MZ. Općina Ilidža je za ove namjene u Bužetu planirala 200.000 KM.





## Edukativne radionice za potencijalne i registrovane poduzetnice Ilidže

Gender akcni plan Općine Ilidža za period 2017-2020. godine je strateško-planski dokument koji direktno podržava primjenu Zakona o ravnopravnosti spolova BiH na lokalnom nivou i definira ciljeve i mjere za unapređenje ravnopravnosti spolova u lokalnoj zajednici, te potiče budući rast i razvoj općine. Uvođenjem principa ravnopravnosti spolova u razvojnu politiku, strategije, projekte i programe je od posebnog značaja za na lokalnom nivou jer je najneposredniji i najbliži građanima.

Jačanje svijesti o ženama u poduzetništvu, edukacija, pomoć općine, redovno okupljanje, umrežavanje, saradnja sa drugim općinama neki su od zaključaka nedavno održanog okruglog stola „Budi poduzetnica na Ilidži“. Kao nastavak tih aktivnosti Općina Ilidža u saradnji sa Udruženjem poslovnih žena BiH organizovala je 10. i 11. decembra 2018. godine dvije radionice. Prva edukativna radionica pod nazivom „Od ideje do biznisa“ bila je namijenjena potencijalnim poduzetnicama zainteresovanim za edukaciju sa ciljem pokretanja vlastitog biznisa i problemima sa kojim se susreću nove poduzetnice prilikom pokretanja vlastitog biznisa. Druga radionica radnog naziva „Uz poduzetničke muke“ namijenjena je registrovanim



poduzetnicama radi unapređenja vlastitog biznisa i lakšeg pristupa potencijalnim fondovima. Kroz stručna predavanja i interaktivan rad dati su odgovori na neka pitanja i dileme sa kojima se susreću poduzetnice u svakodnevnom radu. Radionice su organizovane isključivo za žene i mlade djevojke, te poduzetnice sa područja općine Ilidža.

„Gender akcionim planom Općine Ilidža prepoznata je važnost osnaživanja poduzetništva žena i podrška lokalne zajednice, čime se poboljšava, ne samo položaj žena u društvu, nego i cjelokupna ekonomija lokalne zajednice. Drago mi je da su polaznice radionica zadovoljne i vjerujem da će one jednog dana biti primjer drugim da njihova ideja, uz edukaciju, predani rad i pomoć lokalne zajednice, može postići veliki uspjeh“, kazala je Azra Jahić, vijećnica u Općinskom vijeću i predsjednica Komisije za zaštitu ljudskih prava, predstavki i prijedloga OV koja je nosilac izrade Gender akcionog plana Općine Ilidža.

### Ilidža i dalje lider po broju turista



Prema podacima Zavoda za informatiku i statistiku Kantona Sarajevo za period januar-oktobar 2018. godine, Općina Ilidža je potvrdila liderstvo u Kantonu Sarajevo po broju dolazaka i ostvarenih noćenja turista, broju smještajnih jedinica i ležaja. Kanton Sarajevo je posjetilo 502.790 turista, koji su ostvarili 989.877 noćenja, a broj registriranih dolazaka na Ilidži je 203.1485 turista, koji su ostvarili 375.485 noćenja, što je rekordan bilans.

Ilidža već 11 godina drži lidersku poziciju u Kantonu Sarajevo po broju dolazaka turista, ostvarenih noćenja, broju smještajnih jedinica i ležaja, a u samom vrhu je na nivou BiH. Na području općina Ilidža trenutno je raspoloživo 30 smještajnih objekata sa preko 2.200 smještajnih jedinica i 5.000 ležaja, što čini 1/8 ukupnih smještajnih kapaciteta na nivou BiH. Takođe, i Spomenički kompleks „Tunel D-B“ do decembra 2018. godine zabilježio je rekordnih 140.000 posjetilaca.



### Prijem za Larisu Cerić

Larisa Cerić je dobila najviše priznanje za svoju rezultatski najuspješniju godinu u 2018. godini.

Trofejna bosanskohercegovačka judašica Larisa Cerić, izabrana za sportistkinju 2018. godine u Bosni i Hercegovini, na "Izbor sportiste godine" u organizaciji Olimpijskog komiteta Bosne i Hercegovine. Cerić je u 2018. godini osvojila bronzanu medalju na svjetskom prvenstvu za seniore u Bakuu (Azerbejdžan), srebrnu medalju na evropskom prvenstvu za seniore u Tel Avivu (Izrael), zlatnu medalju na grand turniru u ruskom Ekaterinburgu, te srebro na grand prixu u Antaliji (Turska). Tim povodom načelnik Općine Ilidža prof.dr. Senaid Memić 25. decembra u Općini Ilidža upriličio je prijem za Larisu i njenog trenera Branislava Crnogorca. Načelnik Memić je čestitao Larisi na uspjesima te obećao podršku u želji da Larisa donese medalju BiH 2020. s olimpijskih igara.



## „Drugarica gusjenica“ jedinstven paket sa didaktičkim igrama za djecu sa poteškoćama u razvoju

Udruženje za edukaciju, stručno usavršavanje i cjeloživotno učenje „Edu Arena“ je 21. decembra 2018. godine u hotelu Hollywood na Ilidži održalo svečanu promociju projekta namijenjenog djeci sa poteškoćama u razvoju, pod nazivom (Re)Kreativno-edukativne i zabavne igre za djecu sa poteškoćama u razvoju „Drugarica gusjenica.“

Ovaj projekat prvenstveno ima za cilj da djeci sa poteškoćama u razvoju predškolskog i školskog uzrasta nižih razreda olakša učenje i napredovanje. Da djeca uče i usvajaju nova saznanja i ispoljavaju kreativnost kroz različite igre edukativno-zabavnog karaktera uz pomoć nastavnika, pedagoga, socijalnih radnika ili roditelja. Igre se mogu primjenjivati i u kućnom ambijentu sa porodicom i djecom koja nemaju poteškoća, dakle, igrice mogu koristiti i tipična djeca, kako bi se svi zabavili, učili kroz ove sadržaje i provodili više vremena zajedno. U ovom paketu nalaze se i duštvene igre za cijelu porodicu.

„Stručnjaci iz oblasti obrazovanja i inkluzije kojima smo predstavili ovaj projekat izrazili su veoma pozitivan stav, sa naglaskom na to da za ovakvim materijalima vlada velika potreba. Za izradu igrica koristili smo



veoma prihvatljive materijale bazirajući se na ekološke boje bez mirisa, kojima djeca mogu manipulirati, a svojom kvalitetom utiču na dugotrajnost u korištenju. Za sve smo se konsultovali i sa strukom, čime smo dodatno prilagodili cijeli sadržaj prateći nastavni plan i program. Stoga, vjerujemo da će ovaj projekat doprinijeti mnogo svim korisnicima u njihovom učenju i na to sam veoma ponosan i sretan da je jedna ovakva ideja implementirana i nadam se da će biti od velike pomoći. Hvala svim saradnicima koji su učestvovali u ovom projektu, a posebno hvala donatorima koji su prepoznali važnost ovog projekta, među kojima su Općina Ilidža, Ministarstvo za obrazovanje, nauku i mlade Kantona Sarajevo, Federalno ministarstvo obrazovanja i nauke, Federalno ministarstvo za rad i socijalna pitanja“, kazao nam je Džemal Hurić- idejni tvorac ovog projekta i predsjednik udruženja.



## Odbrana ilidžanskih prostora

U organizaciji udruženja „Zelene beretke“ i „Prva samostalna brigada“, te Općine Ilidža u prisustvu saboraca, članova porodica šehida i poginulih boraca, predstavnika boračkih udruženja, Općine Ilidža i stanovnika Otesa, 4. decembra 2018. godine ispred mjesne zajednice Otes obilježena je godišnjica odbrane Otesa, Azića i Stupa pod geslom „DA SE NE ZABORAVI“. Delegacije su učenjem Fatihe i polaganjem cvijeća na spomen obilježje ispred mjesne zajednice odale počast poginulim braniteljima ovih prostora. Prisutni su se prisjetili tih ratni dana kada su se od 1. do 4. decembra vodile teške bitke i kada se stanovništvo moralo evakuisati iz Otesa, ali su uspostavljene linije odbrane koje su ostale ne promijenjene do kraja rata. U bitkama za odbranu ovih prostora živote je dalo 29 boraca, pripadnika Armije RBiH. Prigodan program izveli su učenici Šeste osnovne škole.

## Prijem za učenike, autore likovnih radova za kalendar Općine Ilidža

I ove kao i predhodnih godina Općina Ilidža je za štampanje kalendara za 2019. godinu kao likovno rješenje koristila najuspješnije likovne radove sa motivima Ilidže učenika osnovnih škola sa područja općine.

Tim povodom, 26. decembra 2018. godine u Općini Ilidža upriličena je prezentacija općinskog kalendar za 2019. godinu i prijem za učenike osnovnih i srednjih škola, autore najljepših likovnih radova, kao i njihove nastavnike likovnog odgoja.

Načelnik Općine Ilidža prof. dr. Senaid Memić čestitao je učenicima čiji radovi se nalaze na kalendaru i njihovim nastavnicima, te im tom prilikom uručio diplome i prigodne novčane nagrade.

„Vi koji ste nagrađeni treba da se ponosite i sad i u budućnosti i svako treba da radi ono što voli. Zapamtite da samo rad donosi vrijednosti i u sve što ste uložili svoj trud jednog dana će vam se pozitivno vratiti. Nadam se da će vas ove skromne nagrade motivirati za dalji rad i trud koji je ovom prilikom prepoznat. Želim vam puno sreće i uspjeha u životu“ kazao je u svom obraćanju učenicima načelnik Memić.

Nagrađeni učenici, autori likovnih radova su: Arnela Herić (Šesta OŠ), Jan Butigan (Katolički školski centar), Hatab Vlahovljak (Osmo osnovna škola „Amer Čenanović“), Fatima Kokanović (Deseta OŠ), Irma Zulfović (Prva OŠ), Lejla Čarkadžić (Treća OŠ), Muhamed Džihović (Četvrta OŠ), Belma Dorić (Deveta OŠ), Elma Ličina (Sedma OŠ), Kanita Hasanhodžić (Peta OŠ), Nejra Salihović (Druga OŠ) i Emar Maryam (OŠ „Mehmed Handžić“).







## “Otvorena vrata” za liječenje Huseina Hadžića

U Sedmoj osnovnoj školi 27. decembra 2018. godine održan je peti humanitarni bazar „Otvorena vrata“. Bazar ovakvog tipa je pokazatelj empatije i spremnosti da se pomogne onima koji su se našli u nevolji.

Nažalost, u našoj državi je mnogo ljudi koji trebaju različite vrste pomoći, a pomoć je najpotrebnija onima koji se bore s opakim bolestima i trebaju liječenje van naše države. Takav slučaj je i sa učenikom ove škole Huseinom Hadžićem, koji boluje od vrlo rijetke bolesti debelog crijeva (Hirschprung). Ovaj destogodišnji dječak treba da ide 17. januara 2019. godine u Tursku na svoju petu operaciju. Jasno je da ovo liječenje iziskuje veliki iznos novca pa je malom Huseinu i njegovim roditeljima pomoć neophodna.

Humanitarni bazar je način na koji se škola odlučili pomoći učeniku. Bazar se sastojao od prodajnog i kulturno-umjetničkog dijela. Učenici su, uz pomoć svojih roditelja i nastavnika, napravili mnoštvo (uglavnom ukrasnih) predmeta koje su prodavali po niskim cijenama. U okviru ovog dijela, kao podrška i pomoć, pridružili su se i članovi Udruženja invalidnih i bolesnih osoba Blažuj

Bazar bio vrlo uspješan jer je odziv roditelja i prijatelja škole bio impozantan, a skupljena je i značajna suma novca (više od 5.000 KM). Zajedno su pokazali da dobrota živi u nama i da se sve može “kad se male ruke slože“. Nadamo se da će prikupljeni novac doprinijeti Huseinovom izlječenju i osigurati osmijeh na njegovom licu.



## Osma osnovna škola “Amer Ćenanović” proslavila Dan škole

Osma osnovna škola "Amer Ćenanovic" 22. decembra 2018. proslavila je 18 godišnjicu. Učenici ove škole izveli su prigodan kulturno-zabavni program za mnogobrojne goste. Direktor škole Vahid Ćustović istakao je da učenici postižu značajne rezultate na svim takmičenjima, te da u ovoj obrazovnoj instituciji ima mnogo projekata po kojima se prepoznaju učenici i njihovi talenti u Kantonu Sarajevo. Osmu osnovnu školu "Amer Ćenanović" pohađa 496 učenika.



## Deseta osnovna škola obilježila Dan škole

Dan škole u Desetoj osnovnoj školi obilježen je 5. decembra 2018. Gosti, prijatelji škole, učenici i ponosni roditelji imali su priliku da uživaju u defileu pjesme, plesa, glume, poezije, folkloru, lijepih riječi učenika, uz podršku nastavnika koji prepoznaju sve njihove afinitete i talente. Učenici su imali šta da kažu i pokažu. Radimo ono što volimo, rekoše nam u upravi škole.



## Obilježen 1 decembar – Svjetski dan svjesnosti o HIV-u

Povodom 1. decembra, Svjetskog dana svjesnosti o HIV/AIDS - u, Crveni križ Ilidža je sproveo nekoliko aktivnosti. Predavači su održali predavanja o ovoj temi u Srednjoj tehničkoj školi grafičkih tehnologija, multimedije i dizajna, Četvrtoj gimnaziji Ilidža i Desetoj osnovnoj školi.

U Maloj Aleji organizovana je podjela crvenih mašnica (red ribbon) koje su simbol podrške populaciji oboljeloj od AIDS-a, kao i podjela edukativnog materijale, te prezervativa.



## Značaj govora kod djece i inkluzivna nastavi u školi

U Drugoj osnovnoj školi 13. decembra 2018. godine u multimedijalnoj sali škole organizovano je stručno predavanje za roditelje. Tema predavanja je bila vezana za inkluzivno obrazovanje, a predavač je bila logoped Birsena Ćurevac. Predavanje je trajalo jedan školski čas, a na pitanja roditelja je odgovarala i pedagogica škole Indira Memić. Tokom predavanja i prezentacije, fokus je bio na značaju razvoja govora kod djeteta predškolskog i školskog uzrasta, najčešćim oblicima govornog poremećaja kod djece, te inkluzivnoj nastavi u školi u cilju integracije djece s razvojnim smetnjama. Naglašen je značaj osnaživanja roditelja i uspostavljanja partnerske saradnje sa školom. Ova škola kako navode u upravi je škola za primjer, jer ujedinjuje različitosti i pruža podršku svakom djetetu.



## Ja "Mahalac" na Ilidži

Komedija „Ja, mahalac“ je jedan od najvećih pozorišnih hitova u Bosni i Hercegovini. Stekla je ogromne simpatije gdje god je igrana, a Mahalac je u stvari komedija o muško-ženskim odnosima koja na provokativan i duhovit način kritikuje današnje pomodarstvo, primitivizam, snobizam, pohlepu za materijalnim dobrima i u formi pripovijedanja uz izvedbu popularnih songova, na zabavno-poučan način publiku proziva, opominje i nasmijava, komentariše fenomene današnjice od eskort dama do papučara, da bi na kraju iznio poruku života: Vjeruj u ljubav. Nasilac glavne uloge je poznati glumac i šoumen Dragan Marinković Maca.

U Multimedijalnoj sali 18. decembra, Mahalac, odnosno Dragan Marinković Maca je priredio odličnu predstavu za Ilidžance.

A u kinu Igman se mogao pogledati i trenutno najpopularniji srbijanski film "Južni vetar". Riječ je o filmu redatelja Miloša Avramovića.



## Učenici Šeste osnovne škole posjetili mljekaru Milkos

Učenici Šeste osnovne škole 4. decembra 2018. godine u pratnji svojih nastavnika posjetili su Milkos, najveću domaću fabriku mlijeka i mliječnih proizvoda u BiH. Kratka posjeta imala je za cilj podizanje svijesti kod djece o kupovini domaćih proizvoda. Kupovina domaćih proizvoda utiče na kvalitet zdravstvenog i obrazovnog sistema kao temeljnih institucija svake zajednice.



## Paketići za djecu bez roditelja

Vrijedne aktivistice Udruženja „Zlatna ruka“ Ilidža realizovale su još jednu humanitarnu akciju kojom su obradovali najmlađe. Ovog puta su osigurali 72 novogodišnja paketića za djecu bez roditelja i djecu u stanju socijalne potrebe. Svečana podjela paketića mališanima organizovana je 24. decembra 2018. godine u prostorijama mjesne zajednice Stup II gdje su im uz zakusku i druženja sa članicama udruženja uručeni novogodišnji paketići. Paketiće su donirali Medina i Majida Alijagić i Senad Dizdarević. Paketiće je dobilo i 25 mališana iz Istočnog Sarajeva.



## Preneseno „Betlehensko svjetlo u crkvu na Stupu

I ove godine, kao i prethodnih, članovi Odreda izviđača „Vrelo Bosne Ilidža“ u povodu božićnih blagdana, na područje općine Ilidža, iz sarajevske Katedrale, prenijeli su „Betlehensko svjetlo“.

Betlehensko svjetlo, doneseno je u crkvu na Stupu i kod sestara Karmelićanki na Stupu, gdje su veoma lijepo dočekani i ukazana im je zahvalnost, na tradiciji koju svake godine obilježavaju, a koju će se i nastaviti.



## Košarkaški spektakl za djecu

U organizaciji Košarkaškog kluba Ilidža 1. decembra 2018. godine u Devetoj osnovnoj školi u Rakovici održan je još jedan košarkaški spektakl za djecu. Utakmicama Minibasket lige osnovnih škola općine Ilidža omogućeno je mladim košarkašicama i košarkašima svih uzrasta da uživaju u igri i druženju. Posebnu pažnju privuklo je takmičenje u šutiranju „ZLATNA RUKA“ u kojem je učestvovalo 150 djevojčica i dječaka u četiri uzrasta. Tri najbolja šutera nagradio je sponsor „JUVENTA SPORT“. Prvo mjesto i poklon bon u vrijednosti od 250 KM osvojio je Fatih Prašović, drugu nagradu od 150 KM osvojio je Ajdin Delić i treću od 100 KM Alina Šabić.

Proglašeni su i najtalentovaniji igrači škola sa područja Ilidže a to su: Eldar Jusić, Rijad Alekić, Ena Mušović, Kenan Kadić, Faruk Kiseljaković, Anel Musić, Džan Prašović, Kenan Sinanović, Kerim Ledinić, Anita Belko, Aner Ramović i Harun Mehmedspahić.

Uz muziku i ples najmlađih, njihovih roditelja i prijatelja kluba završen je ovaj spektakl u kojem su mladi košarkaši i košarkašice pokazali svoj napredak i ljubav prema ovom sportu.

Ovaj projekat finasijski je podržala Općina Ilidža, a zahvalnost pripada i upravi Devete osnovne škole iz Rakovice domaćinu takmičenja.



## Paketići za najmlađe

Uz prigodnu predstavu, Općina Ilidža 27. decembra 2018. godine u Multimedijalnoj sali upriličila je podjelu paketića. Kao i svake godine, paketiće su dobila djeca uposlenika Općine, te djeca pripadnika Udruženja RVI. Podijeljeno je 115 paketića sa slatkišima i igračkama, a mališani su uživali u predstavi Mirsada Abdagića Kiketa, a družili su se i sa Djed Mrazom. Paketići su podijeljeni i za 15 djece oboljele od leukemije koja se nalaze na liječenju u bolnici Pedijatrijske klinike Jezero.

